

芝園文稿卷之十四

閩中趙世顯仁甫著

李承爵子脩校

書

報宗伯姜廷善先生王元美司馬

客秋再獲登龍未由報鯉每讀箋頭大贈未嘗
不猶奉顏色侍提命也某服官五年居然寒士
抑知造物忌多取故苦節以自甘疇意俸久忌
叢官貧毀重向時未獲臺薦者薦而後者刺改

芝園文集卷十四
者或查刷時罪其胥吏者一時蠅聚都門騰鏢
金之口奮舐痔之舌含噴天之血揚吠聲之威
射含沙之影肆毒蛇之螫下落井之石幸宇宙
未大晦冥公道尚存一線以彼深讒受茲薄譴
非賴諸明公仁覆眇哉刑署尚有生肉之骨耳
然之灰乎竊復自嗤賢匪曾參毀言不啻三至
秩非神禹在外幾於八年自此奉母南還一掃
先人丘壠因得訪親識之間吊故交之墓長林
豈草濁酒清琴荷讒人之賜良厚抑又奚怨奚
尤第未知何日再覲台光長懷耿耿丁鼓柁春
江言將千里致睽晤對悠悠我思

再與張蘭谿

旱魃作祟賢令公齋心露禱靡所弗虔憂民心
獨苦哉方愁溪涸一葦難航得借四力不減五
丁遂使逐臣猶然利涉壽謂仁兄功在禹下乎
蓬底展讀訓誡一編尤欽道化金衢俗向頑鄙
齊民譚諸詈詛輒以穢語加聖善人子不忍聞
涉夏則女婦袒裊丈夫衣不下體不浴而裸程

芝園文集卷十四
紛若牛馬父子相視恬弗知惟敗度黜耻莫甚
焉得是書藥之庶其有瘳邪弟所善龍游尹光
祿邦大者清修篤行流也仁兄亦嘗國士遇之
乎併爲擊頽

與趙錢塘

停步澌水之間溪枯石逞鷁首時膠微六力同
情推浼僕不爲涸轍魚哉借仁兄河潤不啻升
斗矣權署陳使君年情倦切僕以抱病行竟未
克闖含香之庭而叩焉晤言間併斬代謝頃度
龍游曾上八行于侍者僕實憫知己之無辜匪
敢爲尹君游說渠行原未相值卽題書渠亦不
知也吾以盡吾心耳知仁兄固必烏而屋之此
君宅住孤村弱嗣從入武林舍中無一主者倘
蚤得遣還仁兄之波及此君尤不淺矣

與許西安

逐客扶持抵三衢耳許侯之名籍甚也憾不卽
造室而悉此衷憐坐暑泄困之不問沐盤者幾
宵晝矣以筆爲面知仁丈能原之自茲以南水

不盈尺沙石齒齒溪幾如陸百斛之舟必不可
渡欲覓小舸以去須藉仁丈寵靈而可不則無
若舟僧袖手而視何矣

與池州公

江臯折柳忽然晦朔已三更矣薄命之人無地
而不妨阻曩舟滯阜林六旦推移不能以寸竟
舍之曾託榜人爲鯉魚想徹鏡臺照矣從此而
南旱甚而流愈涸竟日如行焦釜中蓬底炎蒸
若甌兒女交病護役告勞困心可知也入境幸

劉使君助之郵力扶搖抵舍在月之朔闔門藉
覆得復康適懷藏厚誼未矢勿諼矣東南累歲
困魚鱉浮屍尚未盡覆樞蕤今茲幸不澇而復
憂旱黔首嗷嗷百司坐不帖席不知物態將來
作何狀也逐客竊不能忘杞憂焉池有我公在
當不乏陽春詩雨別來音耗遼邈抑未卜江東
米價視此如何可勝縣念尊屬計卽宇下郎君
日奉清驪孫枝秀發內召璽書且且夕下百順
之備爲我公一鬯心焉新秋鴻雁如織無靳繫

芝園文集卷十四
一槭其足樹此長懷

與余內齋觀察

虎林寄語想入灌餘齋頭矣從此南來流涸炎甚蓬底第抱讀使君詩便如濯萬頃洪波而纍纍消暑珠在握也画鷁尺寸推移幸以是月朔日抵舍計倚權而見望舒圓者三豈罪弃之人命合濡滯邪南天暘亢甚元元均懷涸轍之憂累歲枵腹之餘誠難堪此敢問池中有年乎殊念之秋鴻有翼無靳八行

與諸大令書

虎林作報以後又四十餘日而始還家緣暘亢流涸解艇時膠阻沙石間以故濡滯若此乃知失意履道在在羊腸也花縣雨暘想自時不似南邦憂旱之極所過州郡舉國若狂慙無力爲請於帝驅垂龍於海隅而戮之大施霖雨慰此元元逐客獨餒死不憾也

報林天迪

使君乘傳還鄉里顯重哉歸朝時倘道經彭蠡

芝園文集卷十四
五
當於匡廬選片石相待酌三千丈瀑泉勝如麩
米春萬斛也向者袁公子附我書物于其父今
袁使君五馬東南矣原寄敢附行李以歸之

與袁懋吉

蛟龍蕩而失水輒爲螻螳所苦一升雲霧便自
灑然連朝病困昨得勝遊愉快愉快惜爲榜人
趣返未罄餘歡耳張君舟子殊惡螻螳哉歸來
一律幾就因之敗意乃知騷壇蹇遇不獨風雨
催租也去思錄僅存一帙覽過仍歸篋寄身匪
國僑何武當此厚顏唯池士民之厚以不可誣
耳

與王百谷

入都門諸所知靡不忿嚙我之藝而欲生啖其
肉者良爲公道一大快惟僕則倦遊甚且以拂
衣爲快也乃二三朋戚咸相勸勉謂余寃旣雪
矣而未報主上涓埃何暇自逸僕謂彼曹方厭
死鼠不改玉而趨彼將不忘我嚇無已乃䟽請
改秩靡敢以是爲梧桐爲醴泉棟實要以爲寢

之丘已抑不自意得江州州故陶徵士之所呼
廬而白司馬之所歔歔流涕者也東則東林虎
溪南則匡廬直上五千仞瀑水三千丈瀉若銀
河幸而傳經於此卽浴沂風雩曷以加茲且也
退不失爲陶而進猶將爲白第拚與遠公笑而
弗以琵琶悲耳知我者其謂我何僕自上已下
潞河循漕渠曠甚渠若焦釜舟行七十餘宵晝
今始抵維揚計以朱夏涖江州任諸所欲道者
俟彭蠡鴈銜來也

與高千仞

比來念令大父及爾伯仲甚殷八行來頗悉近
况令叔父不自贍厥兄若猶子而反怨人之田
之也乃踵門而詈我固當獨不慮爲識者所鄙
乎吾獨媿力歟不克田盛門祖孫爲爾叔父姍
笑詈非予所憂也而奚憾焉令大父邇來眠食
何似君與長君大進業否韶光電如分陰可惜
昔人云貧猶可貸而起也不學則難以請而解
予嘗有味乎其言敢以勗子子亦幸以勗吾兒

與吳喬峰姻丈

秋堂杯酒不忝姻誼朋情北來客路蕭條旅懷
索莫來鴻去鯉遂以闕如茲以仕路羊腸嶮巇
未已旣匪敢效楊朱之哭抑未能迴王子之車
漫意青氈爲我家舊物聊復展之明刑弼教匪
曰兼長涖政譚經庶几服習尺疏上請不自意
得江州江州者陶徵君之所宰而白司馬之所
遷者也東林蘭若曠然而爐峰上通帝座飛瀑
瀉若銀河茲獲一開絳帳其間童冠與偕何異
浴沂風雩也者逐臣之拜賜良厚彼蘇公嶺表
賈傅長沙何可同日而道乎知足下必爲我歡
之故敢以聞記室君家季有日斗者月朔邁諸
漕渠舟滯因遣人護之得前以北敢爲傳語報
平安

與劉淳寰憲使

客秋種種深情曾寓尺一于大安丞爲謝已而
如義興謁徐夫子函丈未嘗不共歎明公治行
人品爲清朝第一流僕卽辱在泥塗乎亦時時

向往如罷駑不振何旣遵陸抵燕日煩酬應靡
遑作一語再報心知我懷如織僕始固以半刺
自甘乃二三朋戚謂僕世法不熟恐或外轉意
復來射故未免再展青氊耳青氊吾舊物江州
吾舊遊薄命之人得此爲過斯行第拚與遠公
共咲虎溪靡敢濕青衫如白司馬也嗟僕之廬
都下潛紳靡不欲生食其肉惟僕則以行廢有
命進止唯天彼伯寮臧倉亦胡足責矧心有公
知寃爲衆白僕雖左遷榮如右轉而又奚怨奚
尤舍中過承盼睐而庭訓濶踈兒輩顛蒙不任
驅策側身東望悵矣心飛

寄憲使鴻臺家叔

曩請恩人還得承貺札旣耳叔父轉而持憲喜
而後可知也日法從度池陽庶几得敘睽隔之
懷爲十日之飲不謂相違乃爾旣顯被煩言以
客秋之孟乍歸季秋北上又耳叔父業得石麟
子桂吐馨明珠在握則復津津喜乃抵東澗而
耳祖嬭弃人間事叔父且以憂行不覺泣數行

下嗟嗟人世悲喜相尋慶吊遞及如造化小兒何第願叔父以理御情節哀白玉勿致骨多於形淚盡成血也自淞入燕竟乏便羽可以遣弔茲改秩而西敬寓此於舍下令致炙雞絮酒用寫哀悰惟吾祖嬪之靈歆之而吾叔父諒之東睇烟雲可勝於邑

予與王百穀

五月度真州適有戚蘇君者入金昌遂投入行于其篋而寄方寸于其舌渠詣半偈處想當上弟之書且縷縷譚動止懸河指畫不異謁六諸侯時也足下當知平原無恙乎日者偶道池陽池之士之民之故老孥息傾城出迓驩呼羅拜布滿間巷車不得前比入郡則見豐碑在其市而革履數兩軒然表於門也蓋將誤指江州司馬為宋司馬也者而予則赧然面赤汗浹滋甚矣雖然足徵池俗之醇池人之厚彼蛇裳蠹冠而予毒者是何心乎抵江州以是月十又一日舉比之座巍然與廬峰爭雄長而春風時雨行

且披拂白鹿間足下可無一言俾吾徒如點如
回如偃與參者播諸琴瑟且和而歌之琅然其
聲若出金石乎廬山下首宿甘如飴麻姑新釀
優入聖吳舳可買乘月一來共此清况何論東
鄰殺牛幸無望問不前作剡溪空返也

與余憲使

飄飄逐客安足爲重輕乃明公不忘疇曩握手
欣然至命駕江航而食飲之闔郡蒸黎歡呼相
逐至不忍舍去庸非天下之父爲之侶乎蓬窓
短述用致謝悰咫尺洪流再通魚素

與周公瑕

大漢宮人遠嫁絕漠悲風怒號愁雲黯慘馬上
對胡笳未嘗不泫然霑臆寄聲漢使不知黃金
何日贖娥眉也道履想清嘉百倍弟抵江州後
偶病幾不復住人間世日來方有起色不妨柱
笏看廬山耳幽蘭作一二楮寄我日懸之齋頭
以當晤對太白廬山謠乞書一條幅與蘭回俱
來涼暑如水倘一時得此三絕便當令馬融絳

與王太史周郡丞諸丈

秋郊一樽壯我行色征途千里長念隆情荏苒
風塵倏更寒暑撫今懷昔能無悵然僕以季夏
涖江州卧病幾殆比及清秋乃霍然病已時獲
徙倚元公池畔柱笏看匡山聽三千丈飛瀑流
聲如一部鼓吹不減馬融帳中伎樂堦前種得
三徑黃花纍纍布地若十萬金錢疇謂廣文卑
且窶耶所憾謫居勝槩祇可自娛不堪持贈耳

與用晦芾斯二殿下

僕涖池五載偶遭疑忌辱在泥塗然徼天之幸
得補江州州去豫章四百里而近每拄笏看廬
山朝爽未嘗不念君侯俟菊有黃花時或得躬
詣梁園傾此衷素曩在池陽作報曾託姚匡叔
爲鯉魚姚今猶在伯通廡下乎

芝園文稿卷之十四終

芝園文稿卷之十四終

芝園文稿卷之十五

閩中趙世顯仁甫著

李承爵子脩校

書

與何湖口

尾缶之鳴過承推獎足下華衮僕甚矣讀黎中
秘集想見其人曾記乙丑歲有見投之篇未嘗
收錄豈選者寘之邪僕四同寅塵甌魚釜時時
請急於僕僕涸轍耳無能活巨鱗實藉足下河

芝園文集卷十五
潤如來數所陳倘借別徵得三之一俾購升斗
以紓目前無論四君仰荷惓惓卽鄙人亦大增
氣色是在僕不失爲乞醯之仁而足下實廣烏
屋之愛幸無令去役空還致失雲霓之望渠將
謂僕徒托空言也

寄謝徐郡公

某樗櫟鄙材風塵末品遭時擯弃寄跡江庠自
分涸轍終枯驚弦竟廢詎意明公矜厥妄庸俯
垂盼睐潤以膏澤長其毛羽雖未卽泛海昂霄
然冒此寵光當不終爲腐骨朽翮乎

報吳川樓座師

自入江州兩拜函札兼辱贈章每讀薦書無力
謗書神未嘗不感激流涕也我師之知顯愛顯
卽怙恃肉骨何加焉仰念間每思馳一介奉訊
門墻奈邸中僅僅五役不足供左右奔走用是
闕然惟有神往更未卜征旆何日指匡廬俾鄙
生得奉杖屨如曩時齊山之樂也張侍御翩翩
有情致曾良醫敦篤而精於技業遵命爲致尺

芝園文集卷十五
一于邑長吏如言輕鴻毛何茲偶聞其趨師臺
亟如霹靂倚馬索筆勒此附其橐中齋頭苜蓿
堪把啓戶便覲匡山憾祗可自怡不堪遙寄也
潯陽近有鄙作敬俟梓竟敢辱皇甫公片言增
重我師得無許之乎

答王百穀

向五柳公裔自彭蠡適金閭竟不聞於其師比
其反也乃更拜足下尺一之辱僕嘗自念澤國
遷人貨利無以自媒交游莫拯四載弗克携家

三暮而不得調邸舍蕭然殆同僧室杜門洗耳
時厄在陳雖匡廬飛瀑秀色可餐然出則無車
亦徒懸睇而已失路之夫俗所眇輕曾犬馬草
芥之不若不謂千里舊游尚寘我于臆蹙然之
音不驚散門外羅中雀乎附去鄙稿二秩乞足
下片言冠玉我我將賴以不朽如三都也者幸
毋曰糞土之墻不可圻也

與羅茂才

大篇與西山相映令人應接不暇良用快心何

芝園文集卷五
時共剪西窓燭細論之也延津一片石罔媿國
僑羊祐吾年兄不亡矣李生圖繪足供心賞倘
得一條幅縣之素壁更荷隆情拙筆污丈薄蹠
自覺汗頰惟足下幸教鄙人無遺鄙人也
與張侍御
自夏徂秋大爲炎燄所困無敢冒褊襪之嫌且
也諸臺司去來如織束帶折腰送迓無寧晷憶
促膝尚友熙春時恍然華胥一夢耳幸有二詩
留懷袖傳播人間敬重錄箠頭以獻

與胡孟弢博士

客冬病卧雪中辱足下被以陽春之調每一諷
之便如晤對清光也茲來政圖走謁耳台從且
返鄉中可勝悵悒沅江一夕烏足處應龍知乘
雲雨卽天飛矣僕困躋三載始獲量移蜀之高
梁春來不免叱馭青衫一片何時乾乎

寄芾斯孔陽宗良文孟諸宗侯

春暮單騎度潯拜翰貺之辱曾題謝疏敬託蕭
君爲鯉魚旣循楚抵蜀以維夏之朔任高梁座

席未煖而諸臺使踵接經臨過客若繁星晝宵
執手板折腰走俗狀大失故吾欲榻管向山水
風月間吐片詞未易能得追憶曩時偕二三兄
弟杯酒論心徜徉竟日恍若隔世興言及此良
用愴神反復自惟第有拂衣爲快猶念梁山川
阻險地瘠民疲方今困者未甦昧者未醒弦歌
之化未洽若解綬長往佚身得矣報上之謂
何以是強復就事卑栖罔恤勤瘁自甘倘獲寸
樹以答主知然後焚魚採芝耕巖釣海畢吾
願乎日來新詠幾何無惜傾囊遠致若鄙人則
惟有一掬相思淚付之瞿唐灩澦直入襄漢彭
湖耳

報陳學博

家僅於孟秋旣望還閩爲我丈携八行以去傳
語報平安抵今音耗茫然想寒冬當復西可得
故園消息也大抵閩人宦蜀如使絕國弟千里
無家一官若寄梁俗梗悍人世所希言之毛髮
爲立直俟春來作歸計抑得爲足下作鯉魚矣

方舉巖劉鏡滄俱已登仙錄若朱任宇亦聞桂
吏議林瑞堂進止則弟未之知也浮世萍蓬宦
途荆棘洵可惋歎所謂正有新愁淚非關秋氣
悲古人良不欺我自來蕭然邸舍大類禪僧絕
無好懷香雪集不足冒君詭柰何齒及之惟拜
讀瑤翰則不啻寔然之音令人欣爾有喜使返
草率不罄欲言

報雍郡伯

郎君英邁絕倫自能奮翼起青冥之上安所用
弟緩頰矧鴻毛之說亦惡足爲郎君重輕第辱
大命無敢不竭狗馬力耳朝來風雨千山願且
少留行李

報芾斯宗侯

剖雙魚未久又不覺園林變夏禽矣遊子天涯
懸情石交殊甚第夢中不識路何以慰相思邪
漢魏百篇想再經是正蜀中諸長吏最傾慕之
惜無以應不妨多附鯉魚來也荒詠草草寄去
不足見大雅當爲名園花鳥所嗤足下能無以

教之乎暑炎如焚邑大如掌政繁如蝟民悍如
狼情況可知已泚筆不盡

報宗良宗侯

辱寄西夏凱歌大足方駕岑李乃知老將登壇
部勒指揮自非常調且英風獵獵不啻王翦廉
頗秣林諸少年當退三舍矣薄命之人一官在
遠日與山鬼爲羣溽暑如灼此時愁坐正書空
深慙不能爲和

報孔陽宗侯

烹魚讀大篇婉麗精至往事陽雲新詩秋興詎
尋常齒頰能道咄咄吾孔陽殆神來哉高梁邑
大如掌然薄書之夥酬應之衝民風之惡道路
之嶮巖財賦之匱竭海內尠並焉僕以踈直之
性落羽之餘孑然當此匪木匪石其曷能堪每
睇孤雲便思解綬未知何日得遂定省之懷耳
忽忽入秋悲思更切爲之奈何

寄劉劔閣明府

弟於仁丈誼則友生情均骨肉傾蓋投分便自

芝園文集卷十五
千古可謂前無膠漆邑有金蘭矣判袂以來輒
拜八行千里燕雲勞我魂夢憾連城不售明月
按劍造物忌才悵如之何雖然綰綬專城使星
應宿萬夫待命百里迎竹誰謂主恩薄哉勉圖
報塞責在吾儕亦與心知共勗之而已尊屬去
任總慙儀不宜心惟星輶竟棄我東南杳不聞
訊則不佞弟望時遣楚江魚勿謂衡陽無過雁
也縷縷私衷楮短難窮附見別啓

報曹平仲中丞

遠遺六角標以七言高風襲人明月在握出入
懷袖佩服無已抑耳明公主盟騷雅大振斯文
如僕悒悒何知過蒙獎借豈鈎曲卷竒罔捐於
匠石而參苓溲渤皆俞扁之所不遺邪慙固熏
心感尤次骨仍忘汗頰輒再繼聲秋鴻正繁勿
忘時誨

報劉平江

自得荆陽訊後寤寐長懷不謂洞庭仙吏亦復
有人間舊侶之思也烹魚啓素讀以迴環藹然

異宗骨肉手不忍驛感極涕零矧兼寵錫綢繆
中如行縑脩履皆不佞弟之所需者足下之用
情何其殷殷切至若此乎他附來役完壁渠乃
九頓弗承且善爲其主表衷懷不忝遠使哉無
已且託以報音併繫蟬翼於雁足足下得無罪
我木桃邪諸所委託當不負心縷縷私衷有如
別啓

寄吳子脩明府

判袂畿南參辰相望耳睽楚蜀鱗羽轉遙玉鸞
之和答杳然燕市之狂歌猶昨每一念至能不
刺心惟足下朝夕昌黎鯉馴繼美其驅馳九折
寥落鬱叢妻孥爲養而不能從板輿畏險而不
得御棲遲若此情況可知以是每欲結束東歸
乃上下猶不我舍去徒添雙淚過瞿唐灩澦堆
耳足下嘗以素心多君實今亦何以慰我窮愁
邪小詩題箋却寄情見乎辭餘言具別楮

與曹中丞

某錄錄踈庸不諧於俗抑不嫻於吏事辱高梁

芝園文粹卷之五
九
之民不以其爲不肖稍易其殺子產之心乃我
公又從而虎皮之榮藉甚矣溽暑騷壇想時飛
白雪憾不獲一奉杖屨言追河朔之驩徒有耿
切茲於李幕君往託之爲鯉魚公有教言請唾
之於其耳

報李本寧太史

恭惟明公藝苑宗工清朝儀羽夙欽高誼欲效
執鞭之日久矣臨風懷想縮地無由魚素未通
心旌時動頃緣幕君頗悉道履累蒙齒及雅意
惓切媿僕駑疲不任剪拂量移三載錄錄無音
士庶匪特不殺子產顧咸取其長而棄其短已
自厚顏乃明公復從而藻飾之賁以龍虎之章
寵於華衮之贈重以壽言錫及老母麗詞與綵
服交輝瑤藻偕華顛映發視世之詫東海之桃
侈南山之祝耀西池之宴者彼皆纖纖瑣細不
可同日而談矣是明公單言片詞足俾予趙重
於九鼎大呂光裕後前世世有榮藉焉此之爲
感詎第百朋已乎輒因早雁附致箋箋不腆不

莊神情增悚

寄懷陽蔡別駕年兄

憶自分握不覺幾秋螢矣精神意念靡日不左
右龍光未知晤言何地也習池風景如昨仁兄
政暇日得爲山簡之遊大足愉快不似弟投荒
萬里跼蹐若藩羊然興言及茲良用悵惓茲者
文孟宗侯人龍繡虎濯濯豪英乃故舍朱邸而
嬰情五嶽今且別不佞弟于杜甫祠前買櫂而
尋孟襄陽故里惟仁兄烏及其侍者幸甚

寄魯休寧年兄

自池陽一通寒暄澗然久不聞問已遭讒各徙
天涯南北情況可知惟仁兄德厚猶得翱翔黃
山白嶽間日與五老相旦暮弟移高梁曠若異
域萬里無家四年不調情況又可知已茲文孟
宗侯矯矯詞豪翩翩佳公子含珊瑚寶玦而從
青鞋布襪之遊其人有足多者故於其行使託
之爲鯉魚而因以介紹於地主

與蹇理菴司馬

某自束髮登仕版卽耳蹇大夫其人魁傑竒偉
爲社稷臣私心向之然猶未覩見其文詞也比
讀高篇則翩翩乎颯颯乎直超大曆而上之若
金玉相宣而洋洋盈耳也乃復歎大夫才卽欲
裹糧而西問字無奈職守絆之顧此心則無日
不巴山渝水矣瓦釜之鳴輒筆之扇頭用攄願
望不改以未同爲媿要以切聲氣之慕耳惟明
公運斤成風爲滅其壘幸甚

芝園文稿卷之十五終

芝園文稿卷之十六

閩中趙世顯仁甫著

李承爵子脩校

書

報吳潮陽

春風駘蕩正懸思庾嶺梅花忽然一枝傳自驛
使而後喜可知也矧申以嘉儀蕪之籤帙發緘
伸紙縹緗借玄黃並耀白雪與隴梅俱飛頓令
荒署十倍春生隔千里如晤對矣第四載卑棲

曠若異域寄聲戚朋杳如隔世知我如仁丈殆
空谷之音乎夜來再欲成一篇奉寄緣考績卽
有錦官之行百冗蝟集且去役索報逼甚只得
據案草率外有鄙附不足報瑯卽此亦可徵涼
况也

報胡觀察

分携以還日勤注戀第邑巖才淺宵晝拮据靡
得遑寧以是夢想徒殷八行莫致多負武昌魚
矣冗邊獲剖雙鯉語語至情驟耳蘭芽報謝尤
令人動魄愴衷萬萬爲道自愛喪明之戚古今
所非想達者不爾也某待罪四載餘幸而奏績
雖然夙慝孔多殆未知所稅駕矣

報曹開府

鄙生才短數竒上人率奴虜畜之大似拙婦不
得志於姑嫜無問茗羹冷熱一切訶責亦自念
生來原非封侯骨相卽耕釣自甘不謂天壤中
乃有憐才樂善若明公者愛之誨之極意玉成
之昭雪之如傳竒所稱述姜家孝婦之鄰姑也

者昔賢謂有一相知死且不憾良不欺我第不知如何爲報耳更聞蹇理翁亦同聲齒及尤爲感戢茲亦具有謝啓敢託之使者作鯉魚惟我公命之

寄徐來二年丈

南北分携忽忽數載高情厚誼日勞夢思恭惟仁丈翱翔天路融履亨衢弟辱在泥塗孤羈險絕板輿難御妻孥俱遙萬里懸情四年不調今雖幸而奏最念實切於依親守株之夫不審捷徑安在惟冀劣遷便於歸省一朝之養何論三公乎不然恐不得爲蘇屬國之生還抑徒以資王臨叩之嫺歎而已與言及茲良以於邑情多於楮臨楫悵然公

與褚鴻溪

促膝論心寸晷千古珍饌芳醞至勤內庖良夜樽前頓令客愁如掃此道此情卽巴水岷江方斯爲淺矣藻翰之役敢不惟命日者稍聞君家楮先生玄博士得無與管城子俱來乎

芝園文集卷之六
報曹開府

去家殆將萬里濫竽幾於六年每欲掛冠東還
奉母今幸量轉侍養有期蓋不勝捧檄之喜若
遷之善否爵之崇卑一置之勿問矣辱惠大篇
言言華衮頃令行李增重不必需石鬱林乎

與池郡諸公

數載睽違殊勤懷仰萍踪南北奔走靡間不能
時致八行徼天之倖再轉名邦瞻對有期可勝
欣慰但僕自蜀抵閩原爲迎養不謂老母高年
憚於遠出僕獨子也實不忍舍去以傷母心緣
是走力持文憑呈徼依微雲樹懷想益深後晤
何時與言爲悵縷縷之衷管生莫罄臨楮不任

馳神

報田都諫

楚城別後拮据高梁幾於六載叨轉池陽迂迴
抵舍異獲將母之官不謂家慈憚於遠征僕旣
鮮弟兄抑乏婢妾僅一弱子代養爲難只得投
牒終舞絲歡忽忽杜門歷二年所日惟奉親課

子外事一不關念何期天上故人不遺疇曩遠
惠雲函又兼寵錫情與桃花潭水俱深哉恭惟
足下會際熙隆身依日月清望重於華夷直聲
震乎朝野每從邸報得誦抗章悉忠愛之至情
匡時之偉略蓋長孺不足多匡衡難爲匹者其
爲吾道增光詎淺尠邪與言及茲良以媿懌

與吳叔嘉

曩喜文輅入蜀于時兵革戒嚴幕府聞問難以
遽通將謂竣事歸程獲圖傾吐不謂鷓首順流
東下抱讀尺一悽其連如旣而量移秋浦紆途
抵舍異奉板輿無那老母仍憚遐征遂乃疏請
歸養棲息丘園眷懷舊侶時欲一致八行文以
便羽難俟徒勤夢思惓惓寸衷想彼此如一耳
近聞足下卜居金陵夫金陵繁盛之都巨麗之
區詞客之所總萃也足下建旗鼓虎視中原騷
雅盈編豪賢雲擁倘亦不佞之懷否乎邇者懋
吉動履猶得相聞伯玉幽棲竟所未悉興言爲
悵歡聚何時歲月不居忽復春莫同聲在遠我

懷如何筵頭小作聊以見情且微塲玫二刻附
致清覽北風有翼竚俟德音

與同年陳公望宗伯

睽違許久未由時致雙魚非敢自爲濶踈緣馳
驟風塵靡有寧晷昨自蚕叢量移秋浦遂圖奉
母而行不謂家慈仍憚遠出只得投牒終菽水
歡解綬以來日惟杜門於外務靡有聽睹抑非
敢以習隱爲名高第自念蹇拙庸庸於時又幸
斑衣無恙故惟以自樂其樂耳惟翁丈名重斗

山望隆夷夏方今中外跂足拭目第願司馬再
登光輔聖明以活百姓俾奉萱闈以耕巖釣
海如僕者亦得沐其餘波耳黃山人嚶嚶道古
老而愈篤想五竒九鯉不廢倡訓昔寇公魏野
千古豔譚于今再見乎鄙刻五種不足覆瓿聊
供一噓臨楮增情

與曹廷尉

遊屐返自山中正欲走問飽飫烟霞幾許忽勝
招及之欣然戒膏秣心先已出戶庭矣偶腹痛

芝蘭文集卷之六
六
作泄困憊莫支豈蒼蒼者妬此良晤邪醇情雅
味業已心藏霍然有期異日當爲不速

與王百穀

六載蠶叢曠若異域兼以採木之役深入巖谷
萬死一生每一想念徒勞夢魂卽欲以筆爲面
如江州時亦不可得幸而量移秋浦竊慶搗侍
有期間道抵舍與得躬御板輿不謂家慈仍憚
遠出只得疏乞歸養杜門倏忽三見秋鴻今始
獲以片言繫其足知足下之念僕亦猶僕也近

况想益佳不似僕病甚形神俱憊日自娛親課
子弄孫而外無足爲故人道者扇頭郵作聊用
寄懷拙草猶舊梓全集未及殺青尚與得足下
一言爲三都重耳佳編全帙無靳寄示年來萬
慮都息惟篤古之癖則猶故吾足下得無笑我
迂拙甚邪

與徐連城

潯陽分握忽忽歲年旣而量移胸臆去家八千
里而遙道路險惡曠若異域之便羽可以通心

棲遲五載幸轉池陽竊感倚問之思遂投乞身
之牒杜門謝客宵晝承歡真覺三事九列無以
易此樂者不謂客秋先慈長逝萱闈晝慘夜雨
悲號雙眸欲枯五內盡裂臯魚之痛與天無極
乘絲之娛沒世靡再卽今塊然草土神去形存
瞻望台光徒有於邑恭惟年丈悉心爲國直道
忤時補衮之才屈居製錦魚腸之寶用以割雞
儉士康莊俊髦荆棘世道若此良足悲已不佞
弟辱在鄰封籍籍口碑時從道路得之龍泉終
耀和璧竟剖泥蟠天飛拭目望之矣茲以張生
汝梅適顛之便敬附尺一以輸方寸汝梅者弟
授業師張迪功先生之嗣醞藉丰采大有聲膠
庠篤行甘貧毫不苟取輝遠五庫長卿四壁斯
人無之僕馬之需伏惟留意焉幸甚外附鄙稿
二種就正大方扇頭短章用博瓊玖

報範之家叔

歲底徐秦行後正苦音耗茫然忽拜翰貺喜可
知也顯不幸抱痛草土中謝事杜門無足爲道

志園文集卷十六
弱子小孫俱幸無恙墳亭尚未畢工偶聞楊蒙
事殊令人頭髮上指堂堂我宗於么麼何有但
思萬石弩機不爲鼷鼠而發彼宵人稔惡自有
天刑忍之爲上策吾輩襟度何物不可容鄒孟
氏日無王侯顧乃教人自反於橫逆而中棄不
中才棄不才以爲深戒吾人誦法孟氏不當服
膺厥旨乎大弟千金之軀尤宜自愛力學簡出
大有益於心身古人戒垂堂夫豈欺我念之念
之薄附聊寫鄙衷臨楫增戀

答康孟擔

客歲哀戚方殷未申尺寸第捧誦名刻念足下
不去心每覲紫氣於關門及時詢之季鷹丈覺
音塵杳然卽九溟非遙如隔弱水日來正胸腹
作苦困卧山中偶拜札書詩筆不啻枚生七發
頓令人霍然第未卜入林把臂當在何日耳僕
宦左以忌不以狂大宗伯姜廷善先生貽我書
云本自執持也而人以爲刻本自不羣也而人
以爲傲公道之謂何可謂知予深者雖然歸養

而親不我留山林之事我爲政矣又何暇爭蝸
角而再夢黃梁乎扇頭和章聊博軒渠兼需後
晤

寄大宗伯陳公望年兄

粵自長公從祀時一奏記門下嗣是聞問闕然
徒深耿耿恭惟老年文暫違楓陛養素莆原倘
祥西巖夷猶壺滌逸與雲天等曠藻思霞彩齊
飛文酒時洽乎求羊結撰追蹤於左馬洵哉擅
作德之休而休後天下之樂而樂矣第今陽道

晦冥海內多故貪殘虎視恣橫鳶翔文教陵夷
世風頹靡丈夫婦服閨媛妓妝溺聲色則不顧
廉隅設傾陷或併忘骨肉以讒諂爲長策以奔
競爲要圖以篤行爲迂以守貞爲鄙善惡混淆
是非倒置一切衰世之事層見疊聞人心世道
不無大可虞者老年文身繫社稷望洽蒼生
主上聖明資不世出一旦幡然俛首思耆舊佐
治安起謝傳于東山相司馬於中國吾恐明公
將汲汲遑遑旋乾轉坤之不暇奚暇西巖之戀

而壺涿之依也竊爲天下願之矣僕自惟幼而寡諸壯而戾俗落落一官弗克工於巧笑兢兢尺步屢見妬於時趨用是一意卷懷嬰情娛彩不謂罪重禍深先慈見背卽今煢然草土殘軀柳蒲餘息蓼莪都廢敢論詩章但自髫年酷好此道累碁積歲篇帙頗繁一二同聲未免嗜痴不以覆瓿輒爲登梓每思黔技恒奪氣於六巫睨此蛩鳴敢希聲於皇甫第以泰岱至高曾土壤之弗棄俞跗之籠兼溲渤而併收鉛刀駑蹇倘迴照於風胡孫陽未必不增其氣色長其光價也不揣敬以刻稿馳上惟明公寵之隻字單辭俾鄙野人獲麗驥末而冒虎皮則勝於華衮僕矣日緣脾病新瘥不任煩勞貴地諸相知未克槩致八行卽集中魯魚亦未盡是正俟拜佳序後續當遍寄布此區區惟明公晤間無靳齒頰鄙人幸甚

答三泊傅明軒明府

不佞自胸臆量移秋浦緣母年高請乞終養塵

承歡五歲不幸先慈弃背適因襄事悲痛轉深
積成脾病伏枕累月及今方有起色乃辱千里
心知錫之函教重以朱提情文兼至感慙交并
載讀建白之章如興學清屯息民禦寇優遠具
見嬰情政體留神民瘼可謂文武並用卓爾循
良望重資深下宜上獲內召之期屈指可俟匪
獨吾黨榮當爲世道慶矣

答友人

言辱遠訊良感情深僕素不喜奕亦尠俗交家
芝園文稿卷之十七

閩中趙世顯仁甫著

吳萬全子脩校

小簡

與陸子勉

庭梅三三兩兩吐葩矣昔許燈宵過我乃竟不
聞膏秣徒使鄙人望顏色於屋梁也此燈此花
今夕猶堪共賞足下儼然過之便當傾罇達曙
無令花神笑人

答金明府

見委無敢辭識匪孫陽第恐眼迷冀北耳
與友人
春來風雨連朝不堪愁况亭午一樽共破之亦
曾約陸郎矣

答黎孝廉

羈宦於斯往來寡甚不比家食時春風裘馬日
入少年場也足下何遽拒青州從事乎第爲我
來要不敢以觥籌相苦

答陸子勉

偶困倦一枕黑甜夢紫衣人授以夜光之璧醒
則侍史進公家集及大篇夢中所見豈卽是邪
公暇偶爾臨池苦陶泓性狹與玄光子不相能
坐令毛穎先生失色甚勞侍子調和聞記室有
石虛中者度頗宏濶暫令過我一助濡毫不久
仍返非敢長留幕下也

與金明府

聯書令工正譔不紀記室政如嫖母傳粉黛益
增其醜耳

與黎思正

一夕淋霖園林幾成池沼知足下廣種嘉魚故
使長鬚隔籬贈以新水不日滿尺當卽烹之酌
吾大惠可也若日以鄰國爲壑則匪僕之心矣
與友人
睽澗許久懷想殊深念名園好鳥嘉魚美姬豔
曲也足自樂區區羈宦徒有神往悵如之何

報黎孝廉

小集秣足爲覆瓿之需諒不至長維陽紙價乃
辱足下惠我薄蹠深媿之也

答友人

夜來載弄之瓦自覺泰岳隆隆尊矣可一鼓掌
朝暉在戶主人尚未熟黃梁忽覺始知使者持
錦字來也

答嚴都諫

夕時念枉長鬚讀遠翰蓋語語夜光矣夙稱

哲匠不誣也

答蔣邦士

聞君登大將壇不佞已堅壁矣乃復趣戰令人
毛髮上指遂部勒管城兵俾石將軍楮玄二都
護作背水陣以俟必有當也

答袁孝廉

足下賢聲藉藉爲吾道增光不佞自當解頡詎
第式廬而已

答思正

來作頗玄足爲羽流增重僕忻然爲足下筆之
山陰鷺當爲我籠中物矣

還研帖

石先生留記室久助我藻翰良多蓋不忍一日
舍之去聞足下且建穹碑欲煩此君一佐文事
敬遣役護至惟公所指揮之

與黎孝廉

使乎何時來乞命爲僕順致八行于唐先生左
右

與沈太學

向夕徑醉花前自謂可與謫仙伍知主人愛客甚不恠吾曹達曙驪也

寄張惟守

別來無何乃爾改歲春光九十忽又平分追憶冬暮偕足下引之輩高眺吳山江湖在望疎林霽雪景色宜人短檝言旋真如游仙夢乍醒也

上巳帖

小堂前桃花散綺柳色搖金亭午期足下浮白一賞之矧時當上巳雖無蘭亭曲水一觴一詠亦何忝前人

報陳郡守

歲月不居時節若流轉盼之間青陽欲暮伏審台候值此春和湖月山雲鳥聲花馥種種入詩囊矣

重報李先榮

夜歸披睹雄筆感逾百朋篝燈草此奉酬句旣不工音復鄙拙下過目得無鼓掌笑曰何物

僖父輒敢以燕之報懸黎也

報姚太學

不奉清揚兩度哉生魄矣獨憾烟波爲阻莫得
時時過從傾盡心曲足下琴書稍閒幸無忘移
画鷁一過趙王孫爲十日飲也春序方深落紅
浦徑敬命蒼頭聚茵以俟

報文休承

齋頭兀坐正爾懸思忽來雲函光恠蒲室匪僕
當之幾辟易矣足下耆年碩望高出斗山妙染
佳詞照耀唐晉僕何人斯獲拜茲贈敬用捧持
或留懷袖時時披覲用播仁風

答友人

昨拜瑤翰幾棲鳥矣篝燈草此殊慙不文知鴻
筆必先自運無庸此不文者爲也顯白

與張季賢

一接清光遂出肝膈相示所謂傾蓋如故非邪
同心同調海內幾人真不忍令画鷁遽東耳

報金明府

別來魂魄兩復非矣。瞻戀之私與日俱積，不識鳴琴之暇，亦復念及鄙野人否也。蜀道之難如上青天，蓋自昔歎之不佞，以蒲柳之姿，犯暑登陸，程途勞困，形容變衰，回思故人，何能不悒悒邪。

報丁觀察

僕錄錄亡竒，辱明公不鄙，弗以庸衆人待之恩，意蒸蒸厚也。僕雖駑馬，敢負明公哉。翹首鶴宮，烟雲千里，言不盡意，悵矣心飛。

報文休承周公瑕

先子墓文一經大筆，便足千古。地下人庶，几無憾不佞。戴公之德，何時可忘邪。

報王百穀

前月奉記，知足下且之秣陵，想彼中山色、江聲、總入詩囊，滿矣。回鷁何時還，消息如隔弱水愁。予今奈何，邑役行附布，此向楮冊。旣落墨，槭與來無令鄙人空延竚也。

重報百穀

役來待至雙鯉出而烹之得君片言未嘗不感
激流涕也足下念我情與胥江俱長哉

與王汝存

早投牘問伊人渠卽過我諉咎於左右然數日
來幾悞仁父作田光先生噫嘻安得燕太子虞
生輩而與之論俠

與高存德

忠言逆耳自昔嘆之僕不自攻已慝而輒欲世
爲君子亦惑矣足下能無嗤我迂拙乎雖然交
友而不忠告不如無交有舌而不吐忠言不如
爛去

與友人

颶風大發宜戒舟航足下無遽歸也

報鄭孝廉

宵來幾瘞骨糟丘勒傳生碣矣今猶困甚恐不
克從足下游願足下焚却鸚鵡杯無復蹈予轍
也陳生實樽罍間曲逆不可不善備之

報林貞齋

昔者無幽不探無地不飲無草不藉遊竒矣且
得夢弼爲不速客白髮與烏山相映又一竒也

與陳履吉

佳編出以視客客輒爭持以去寶若明月然遂
令鄙人几案無色茲願復有請也惟勿恡再投
今且以爲悵中秘耳

與友人

邇不聞足下有他讌命侍子啓醇割鮮異共頌
倒乃駕弗少延令罇罍失耀得非畏平原十日
乎抑不任杯杓恐見嗤劉家婦也籬菊搖金圃
蓉散綺何日能來譚此秋况更無人素娥青女
嗤人

送筆帖

特選管城一矢以助詞鋒不多致者審足下必
能以一當百斬將搴旗也

與王季孺太史

鄙刻慝匪三都謬意借光皇甫足下業已相許
今能不虎皮斯集乎敬用奉請兼丐彈射伏惟

倚馬俾付雕龍大賦

報周我遺

對客正誦王右丞野老與人爭席罷之句忽拜
延之書有趨勢之說幾驚散我鷗羣丈夫急心
知何論朱門蓬戶也雖然益見陳生俠譚有旨
哉天琢虫刻多驚時語要當面盡長倩寓何所
頌一指僕令馬首無背馳也聚語何時異諸君
索我於形骸之外

與王季孺

客至自吳門以荷花三白見餉敬分一器入足
下伯仲品嘗雖未敢稱聖當不作平原督郵耳

報友人

不佞索居時不堪閒寂輒呼太史公司馬相如
李青蓮春陵荆聶諸豪士及季路言游輩與之
下上議論詎必皆挾刺哉足下其勿以弗報予
爲歎大篇婉麗讀之足散人鬱抱第未知何日
得抵掌談耳

解衣帖雪中與劉徵君明漸

芝園文集卷十七
雪裏念足下衣單解此爲贈自諒身匪挺之必
不見卻於無已也

報謝光祿

卧痾經旬日來方有起色尚未脫然頃拜大教
何啻少陵詩孔璋檄也一卒業想當霍然病已
耳

報許郡守

木桃未投先辱璫貺下里之曲乃博陽春且齊
紈併錫仁風下宣僕一舉手敢忘大惠附去韻
音五帙用佐騷壇指揮臨楮戀戀

報王旭東司理

辱芳菊之惠馨踰三徑煥若五雲聊一坐對不
覺肺病盡消也夜沾醇醑朝拜芳華耳目心膽
皆高情浹洽矣

報吳年丈

青女方臨而兒曹且負笈湖綿履襪足備嚴寒
吳毫可資研席足下之貺珍而渥矣蟬翼之報
良用媿心

簡同寅諸郡長

杏花大發枝頭好鳥如喚壺觴我公旦日得無
意幸臨之乎已戒庖人開醞擊鮮而俟

重報振狂

朱明蘊燄金素應節小齋幽爽想念彌殷憾不
爲勒畢人又無懷夢草則亦徒望顏色于屋梁
而已足下斯時垂綸白龍岡上清吟薄醉能無
儔侶之思乎則曷不乘輿而來一共握管吟風
飛觴嘯月也阿綉一端聊代縞紵新編一束用
博瑤音外有所詢語具別楮

報藍姑丈

論及忘名極爲至論但僕未嘗有意求名故亦
無意辭名辟火何嘗求光而人自見之耳若乃
有意求名名必不可得何者造化忌奪其權也
昔者黃帝遺其珠子赤水俾象罔索而得之卞
氏之璧屢獻而遺卞此非名實之辨與非有心
無心之致與

與劉二

伊人啣盃酒至驩也轉眼卽相魚肉庸非冠履
之熬乎

與朱郡博

跋語工甚要匪僕所敢任政如敦給蒙粉黛祇
益其汗顏耳

與夏孝廉睿甫

夜來狂歌痛飲天地爲空醉夢乍醒朝暾在戶
尚訝落月屋梁也強起兀坐惆悵思君殆不可
任偶聽喚友流鶯輒成短句足下試一歌此安
所用五斗解醒乎

寄睿甫

征旆遽西遂令樽俎含羞山川無色悵悒何如
每一登樓便思插翅憾不爲勒畢子翔入騷壇
吐此懸結非久當於五老白鹿間一遲前騶再
傾衷素臨楮增懷

邀賞絳桃

雨後中庭緋桃開遍午期浮白同醉花前雖無
劉阮竒逢當不讓武陵佳况

與于都護

去月連值春陰且驅馳鞅掌不及一過看牡丹
昨耳花事將殘可勝惆悵咫尺尚爾更未知明
年花發當於何處寄相思也

與張侍御

日東帶走俗狀未由再過玄亭親大雅抑徒夢
寐釣天而已

與林天迪

使君乘傳還鄉里顯重哉歸朝時倘道經彭蠡
當於匡廬選片石相待酌三千丈瀑泉勝如麩
米春萬斛也

與用晦宗侯

心切登龍迹同奔馬政爾懸念忽損函貺之及
知足下猶不忘墜履遺簪乎

報馬梁園年丈

法駕在皖乃不忘鄙劣錫以醪羞飽德醉心卽
十日之飲弗懽於此矣皖中將品筆上行臺中
都文武諸評何時得從天而墜也敢以促侍史

與邢殿元

鬯飲百巡流觀千古向夕之會人間可多有乎
甕缶之奏用博鈞天傾耳而俟

答邢君典

捧讀來章木難盈把匡廬秋色得此增竒怡目
鬯心又匪特古鼎圖書已也

答友人

僕雖家城市舍後有園可五畝許頗富竒花脩
竹客至則命酌賦詩留連竟日白雲滿襟明月
在袖松風入耳宿鳥驚棲幽興轉增樂而忘寐

與徐惟和興公

炎蒸困人日卧北窓下提不律如扛鼎晨興稍
陰爽乃獲了宿負知我者能無爲我是正之乎
與陳平夫

歲行且暮思足下如渴乃竟不能買一櫂渡江
獨無離索之歎乎山亭梅事將闌憾無平夫之
字花神暗底咲人僕實難之解其不味量也

復吳子脩

夫良之坡人入朝國中

我輩旗鼓中原彼小夫見之如入八陣圖中昏
眩欲死乃云輕議卧龍公多見其不知量也以
大雅而遭一時讒賊之口即李杜猶不免要之
後世有子雲耳

芝園文稿卷之十七終

